

Oqaaseqaatit nalinginnaasut

Siunnersuutikkut anguniarneqarpoq aktie- aamma anpartsselskabit, kattunniarnertik akileraaruteqaataaangitsumik pinissaa anguniarlugu Skatterådimit qinnuteqarsimasut aammalu akuerineqarsimasut, pappiaqqanik nalilinnik naqissusiinermi akitsuummik akiliisinnegartannginnissaat. Nalinginnaavooq kattunneq kingornussinertut ingerlanneqaraangat tamatuma akileraaruteqaataaanginnissaata Skatterådimit akuerineqartarnera, tassa imaappoo selskabip peqataalersup pigisaasa nalikillilerneqarsinnaasut sinneri, piffissat pigineqalerfii il.il. selskabip ingerlaannartup nangissagai, kiisalu selskabimi peqataalersumi piginneqataasut selskabip ingerlaannartup aktiaataanik akiliiffigineqassasut, aammalu nikingassutaannik aningaasanngorlugit tunniussisoqassatillugu aningaasat, taakku aktiaataasa nalingisa annerpaamik 10%-iisut annertussuseqassasut.

Siunnersuutikkuttaaq anguniagaavooq pantebrev-it il.il., takornariat unnuisarfissaannik pilersitsiortornissanut aningaasaliisarnissanut aningaasaateqarfimmut aammalu takornariaqarnermik inuussutissarsiuteqarniarlutik aallartisartut aningaasaliiffigineqartarnissaannut ataatsimiititaliamut sananeqartut naqissusiinermi akitsuummik akitsuuserneqartannginnissaat.

Siunnersuutip allaffissornikkut aningaasatigullu sunniuteqarnissaa naatsorsuutigineqanngilaq.

Aalajangersakkanut ataasiakkaanut oqaaseqaatit

§ 1-imi nr. 1-imut, 2-mut aamma 3-mut

Siunnersuutigineqarpoq pantebrev-it aamma akiligassaqarnermut uppernarsaatit, takornariat unnuisarfissaannik pilersitsiortornissanut aningaasaliisarnissanut aningaasaateqarfimmut (Unnuisa), imaluunniit takornariaqarnermik inuussutissarsiuteqarniarlutik aallartisartut aningaasaliiffigineqartarnissaannut ataatsimiititaliamut sananeqartut naqissusiinermi akitsuummik akitsuuserneqartannginnissaat.

Naqissusiinermi akitsuummik akitsuusigaannginnissami piunasaavooq pantebrev-ip, takornariat unnuisarfissaannik pilersitsiortornissanut aningaasaliisarnissanut aningaasaateqarfimmut (Unnuisa) aammalu takornariaqarnermik inuussutissarsiuteqalerniarlutik aallartisartut aningaasaliiffigineqartarnissaannut ataatsimiititaliamuunngitsoq (TAT) qularnaveeqqutitut tunniunneqannginnissaa. Taamaaliortoqassagaluarpat § 5 malillugu pantebrev-i naqissusiinermi akitsuummik akitsuuserneqartussanngusaaq.

Qularnaveeqqutitut uppersarsaatip allamut tunniunneqarneranut uppersarsaat piffissami pilersinneqarfimmini akitsuuserneqartussangussaaq. Assersuutigalugu inuup nammineq pantebrev-iliai Unnusa-mut qularnaveeqqusiussimasani aningaaserivimmi akiitsuminut pingaanginnerusutut qularnaveeqqusiuppagu inuup nammineq pantebrev-iliaa piffissami pingaanginnerusutut qularnaveeqqusiussinermik uppersarsaasiorfimmi akitsuuserneqartussangussaaq. § 5 malillugu inuup nammineq pantebrev-iliaa, nalinga malillugu akitsuuserneqassaaq, tassa aningaaseriviup atukkiussaasa amerlassusii apeqqutaatinnagit. Akitsuutip akilernissaa aningaaseriviup attartortullu akisussaaffigaat.

§ 1-imi nr. 4-mut

Selskabit marluk kattunneranni selskabip peqataalersup pigisai selskabimut ingerlaannartumut tunniunneqassapput, soorluttaaq selskabip peqataalersup pisussaaffii, matumani ilaallutik akiitsui selskabimit ingerlaannartumit akisussaaffigineqalissasut.

Siunnersuutigineqarpoq selskabip peqataalersup pigisai naqissusiinermi akitsuusigassaatitaasut selskabimut ingerlaannartumut tunniunneqarnerminni naqissusiinermi akitsuummik akitsuuserneqartanninnissaat. Tamanna aamma atuutissaaq akiitsoqarnermut uppersarsaatinut imaluunniit pantebrev-inut selskabimit peqataalersumit pilersinneqarsimasunut, tassalu selskabimit ingerlaannartumit pisussaaffigineqalersunut.

Assersuutigalugu selskabip ingerlaannartup aningaaserivimmi kassekreditimi annertussusaa qaffanniarpagu, taava assersuutigalugu pantebrevi aningaaserivimmi kassekreditimut qularnaveeqqusiunneqarsimasooq naqissusiinermi akitsuummik akitsuuserneqassanngilaq, qaffaaneq selskabip peqataalersup aningaaserivimmi kassekreditiani, ullormi kattuffiusumi killiffiusimasup angeqqataanik taarserneqarpat.

Naqissusiinermi akitsuummik akitsuuserneqartussaanginnermi piimasaavoq selskabit kattunniartut kattunniarnermik akileraaruteqaataanngitsumik pinissaa Skatterådimit qinnutigisimassagaat aammalu akuerineqarsimassasut.

Nalinginnaavoq kattunneq kingornussinertut ingerlanneqaraangat tamatuma akileraaruteqaataannginnissaata Skatterådimit akuerineqartarnera, tassa imaappoq selskabip peqataalersup pigisaasa nalikillilerneqarsinnaasut sinneri, piffissat pigineqalerfii il.il. selskabip ingerlaannartup nangissagai, kiisalu selskabimi peqataalersumi piginneqataasut selskabip ingerlaannartup aktiaataanik akiliiffigineqassasut, aammalu nikingassutaannik aningaasanngorlugit tunniussisoqassatillugu aningaasat, taakku aktiaataasa nalingisa annerpaamik 10%-iisut annertussuseqassasut.

§ 1-imi nr. 5-mut

Allannguutit kinguneriinnarpaat.

§ 2-mut

Siunnersuutaavoq Inatsisartut inatsisaata 1. juni 1998 aallarnerfigalugu atortuulernissaa.